

Stádas na Gaeilge

Ceist 1 Beidh tú ag féachaint ar thuirisc ar ball faoi fheachtas nua atá seolta ag Conradh na Gaeilge. Cén Ghaeilge atá ar na focail/frásaí seo thíos? Beidh siad le cloisteáil sa mhír.

- *entitled*
- *purpose*
- *core subject*
- *exemptions*
- *amid threats, in light of threats*
- *according to research*
- *Irish-Medium college*
- *proportionally*
- *against compulsory Irish*
- *success*
- *comprehensive policy*
- *that links*

Bí ag obair leis an duine in aice leat agus tugaigí buille faoi thuairim ar ábhar na míre.

Ceist 2 Féach ar an mír den chéad uair le feiceáil an raibh an ceart agat. Pléigh ábhar na míre arís leis an duine in aice leat agus breacaigí síos na pointí is tábhachtaí.

Ceist 3 Anois, féach ar an tuairisc arís agus freagair na ceisteanna seo:

1. Cad é *Gaeilge4All*?
2. Cad iad na tuairimí a léirigh Julian de Spáinn agus Seán Byrne faoin scéal?
3. Cad a léirigh an taighde a rinne *Kantar Millward Brown* agus *The Sunday Times*?

Ceist 4 Bí ag obair leis an duine in aice leat.

A. Cuirigí an t-alt roimh na hainmfhocail bhaininsneacha seo thíos a bhí le cloisteáil sa mhír, agus athraigí más gá iad.

- *feidhm*
- *teanga*
- *Ardteistiméireacht*
- *bagairt*
- *aidhm*
- *Gaeilge*
- *scoil*

B. Bainigí amach na lúbíní sna samplaí thíos agus cuirigí an fhoirm cheart den ainmfhocal agus den alt sna bearnaí:

(deacracht)(an)(feidhm) _____
(áilleacht)(an)(teanga) _____
(brú)(an)(Ardteistiméireacht) _____
(tromchúis)(an)(bagairt) _____
(i dtreo)(an)(aidhm) _____
(labhairt)(an)(Gaeilge) _____
(geata)(an)(scoil) _____

Ceist 5

Cén t-ainm briathartha atá ag na briathra seo? Bhí siad le cloisteáil sa mhír. Cuir in abairtí iad lena mbrí a léiriú.

cosain, neartaigh, bagair, fan, foghlaim, tit, tabhair, fág, mol

Mar shampla:

Seol – seoladh

Beidh a leabhar á sheoladh amárach aige sa siopa leabhar i lár na cathrach.

Ceist 6

Obair ghrúpa: Cad iad na buntáistí agus míbhuntáistí a bhaineann le:

- 1) An Ghaeilge a bheith mar ábhar éigeantach.
- 2) An córas bronnta díolúintí ón nGaeilge.

Treoracha agus Freagraí

Ceist 1

Iarr ar na foghlaimeoirí na tuairimí atá acu faoin stór focal agus faoi ábhar na míre a phlé le chéile sula seinnfear an mhír.

Ceist 2

Is féidir an stór focal seo agus ábhar na míre a phlé tar éis féachaint amháin:

entitled – dar teideal

purpose – feidhm

core subject – croí-ábhar

exemptions – díolúintí

amid threats, in light of threats – i bhfianaise bagairtí

according to research – de réir taighde

Irish-Medium college – gaelcholáiste

proportionally – go comhréireach

against compulsory Irish – i gcoinne na Gaeilge éigeantaí

success – rathúlacht

comprehensive policy – polasaí cuimsitheach

that links – a nascann

Ceist 3

Féach an script.

Ceist 4

A

an fheidhm

an teanga

an Ardteistiméireacht

an bhagairt

an aidhm

an Ghaeilge

an scoil

B

deacracht na feidhme

áilleacht na teanga

brú na hArdteistiméireachta

tromchúis na bagartha

i dtreo na haidhme

labhairt na Gaeilge

geata na scoile

Ceist 5

cosain – cosaint

neartaigh – neartú

bagair – bagairt

fan – fanacht

foghlaim – foghlaim

tit – titim

tabhair – tabhairt

fág – fágáil (fágáint a dúradh sa mhír)

mol – moladh

Ceist 6

Is féidir grúpaí de thriúr nó de cheathrar a chur ag déanamh an phlé seo agus ansin cuid de na tuairimí a phlé leis an rang iomlán.

Siún Nic Gearailt

Anois, sheol Conradh na Gaeilge feachtas inniu dar teideal *Gaeilge4All*. An fheidhm atá leis an bhfeachtas seo ná an Ghaelainn a chosaint agus a neartú sa chóras oideachais. 'Tá an teanga mar chroí-ábhar Ardteiste i mbaol' a deir Conradh na Gaeilge.

Caoimhe Ní Laighin

Léiríodh go leor inní le déanaí faoi athruithe sa gcóras bronnta díolúintí ón nGaeilge. I bhfianaise bagairtí éagsúla mar sin, lainseáil Conradh na Gaeilge feachtas dar teideal *Gaeilge4All* inniu, go bhfuil sé mar aidhm aige an teanga a chosaint sa gcóras oideachais.

De réir taighde a rinne *Kantar Millward Brown*, deir 64% den phobal gur cheart don Ghaeilge fanacht ina croí-ábhar go dtí an Ardteist.

Julian de Spáinn, Ard-Rúnaí Chonradh na Gaeilge

Tuigimid ar fad go mbeidh tubaiste ann más rud é go n-athraítear¹ an stádas sin. Ní gá ach breathnú ar céard a thit amach i Sasana nuair a athraíodh stádas an GCSE. Tá an méid daoine ag foghlaim teangacha tar éis titim go substaintiúil.

Caoimhe Ní Laighin

De réir taighde a d'fhoilsigh an *Sunday Times* inné tá gaelcholáistí go comhréireach, ar chuid de na meánscoileanna is fearr sa tír. Tá an tráchttaire agus iar-léachtóir seo i gcoinne na Gaeilge éigeantaí. Chomh maith leis sin tá ceisteanna aige faoi rathúlacht na n-gaelcholáistí.

Seán Byrne, Tráchttaire

Rud eile a dhéanann daoine beagáinín soiniciúil ná go bhfuil pointí breise á dtabhairt do dhaoine a thógann na hábhair trí Ghaeilge san Ardteist. Ó mo chleachtadh féin agus ó bheith ag caint le cuid de na daltaí sin nuair a bhí mé i mo léachtóir – an chuid is mó díobh, ní labhraíonn siad Gaeilge tar éis an scoil ... an gaelcholáiste a fhágáil.

Caoimhe Ní Laighin

Ach aithníonn Conradh na Gaeilge an pointe áirithe sin. Tá siad ag moladh, mar chuid den bhfeachtas seo, gur chóir polasaí cuimsitheach a bheith ann a nascann úsáid agus múineadh na teanga ón réamhscoil go dtí an tríú leibhéal.

Caoimhe Ní Laighin, Nuacht TG4.

¹ gur athraíodh a dúradh